



The Southern African Agri Initiative (Saai) is an agricultural interest network for farmers by farmers, which is committed to the protection and promotion of the rights, values, ideals and needs of family farmers in the primary produce sector.



saai
MANIFES

'N NETWERK VIR FAMILIEBOERE DEUR BOERE

Familieboere vorm 'n klein segment van bevolkings wat in plattelandse gebiede woon en boer. Die grootste persentasie stadsbewoners kan hulle beroep beoefen en 'n lewe maak omdat daar genoeg boere is wat verzekер dat mense voldoende kos het om te eet en klere om te dra. Die wese van landbou het egter oor verskeie millennia dieselfde gebly.

Landbou het met produksie uit die grond te doen en behels die volgende:

- passievolle, kreatiewe bestuur en integrering van die son, reën, hitte en lig met die voedingswaarde van grond sodat oeste gelewer kan word
- beskerming van lewende hawe teen siektes en roofdiere
- beskerming van bome en graan teen plae, onkruid, buitengewone temperature en klimaatfaktore
- ontwikkeling van 'n omgewing waarbinne produkte floreer
- volhoubare en winsgewende boerdery.

Dit is egter belangrik om in gedagte te hou dat hedendaagse boere, as gevolg van 'n groeiende sensitiwiteit vir foute en terugslae in een-entwintigste eeuse geindustrialiseerde waardekettings, uitdagings moet konfronteer waarmee vroeëre geslagte familieboere nie te doen gehad het nie. Die volgende aspekte kan as voorbeeld van nuwe uitdagings dien: klimaatsverandering en globale verwarming, kommersiële konflik, storting van surplus produkte, ontbossing van woude, erosie en uitputting van grond, antimikroiale weerstand, regeringsinmenging in markte en die omskakeling van boerdery na korporatiewe instellings.

Vanuit die perspektief van bogenoemde bedreigings neem die volgende verskynsel op globale skaal ernstige afmetings aan: groot boerderye word groter en multinasionale maatskappye neem primêre produksierolle oor terwyl kleinskaal boerderye toenemend van markte ontnem en gemarginaliseer word. Vir die eerste keer in die landbougeskiedenis word die voortbestaan van familieboerderye bedreig.

Globaal gesproke word drie belangrike argumente ten gunste van familieboerdery as hoeksteen vir landelike ontwikkeling beklemtoon:

- Familieboere rugsteun ekonomiese op die grens van stedelike gebiede.
- Dit kan verstedeliking en armoede effektiel voorkom.
- Dit hou discipline, stabiliteit en waarde in landelike omgewings in stand.

Landelike gemeenskapsleiers is van mening dat skole, kerke en kooperatiewe of landbougebaseerde besighede belangrik is vir die voortbestaan van plattelandse dorpe. Indien enige van hierdie drie verdwyn, verander 'n dorp in 'n geraamte van wat dit eens was omdat mense deur groter dorpe aangetrek word. Geen sektor akkommodeer 'n groter verskeidenheid entrepreneurs of skep 'n breër spektrum van werkgeleenthede en welvaart as familieboerderye nie. Familieboerderye kan beskou word as die gom wat landelike gebiede bymekaar hou.

Die Suider-Afrikaanse Agri Inisiatief (Saai) is te midde van bogenoemde uitdagings en die werkliekheid van die vierde industriële revolusie gestig. Saai is 'n netwerk van gedeelde landboubelange vir boere deur boere en is daartoe verbind om die regte, waardes, ideale en behoeftes van familieboere binne die primêre produksiesektor te beskerm en te bevorder.

Boere is genoodsaak om 'n veelheid van uitdagings te oorkom, waarvan die volgende enkele voorbeeld is: grondhervorming, veiligheidsrisikos, beperkende handelsmaatreëls, klimaatverandering, asook 'n gebrek aan ontwikkeling, opleiding, energie, hulpbronne, water, landelike infrastruktuur, tegnologie en toegang tot finansiering in die landboubedryf. Saai is as belanggroep daartoe verbind om 'n aktiewe rol te speel met betrekking tot die uitvoer van aktiewe strategiese oplossings vir bogenoemde en ander landbouverwante uitdagings en nie slegs te hoop op beleidaanpassings nie.

– SAAI beskou homself as ‘n voertuig –

om bogenoemde sake na te streef, nie as ‘n tradisionele labou-unie nie, maar eerder as ‘n netwerk wat gebou is op samewerking en die toepassing van moderne tegnologie en suwer beginsels.

Familieboere in Suider-Afrika, waar SAAI dienste lewer, is nie slegs groot of klein, ryk of arm, oud of jonk, swart of wit, gevvestig of opkomend, manlik of vroulik nie. Hulle is families wat grond besit en deur middel van hulle bestuur en verbouing van primêre produkte besighede ontwikkel.



VERENIG DEUR SAMEWERKING

Saai beskik oor toegang tot kundige vennote wat ons in staat stel om 'n wye spektrum vraagstukke onder die mikroskoop te plaas op grond van samewerkingsooreenkomste met en wedersydse ondersteuning van landboubesighede, handelsorganisasies, navorsings-instellings, en landbou organisasies wat op ander ondersteuningsbasisse fokus. Dit is om hierdie rede dat Saai bestaande landbou-unies en organisasies as vennote in die bereiking van ons doel beskou, en verenig eerder as verdeel.

Saai beskou landboubesighede en die regering as belangrike rolspelers vir die bevordering van landbouhandel en sal voortdurend daarna streef om samewerking met hierdie partye te bevorder indien dit tot voordeel van ons boere is. Die belang van boere en die genoemde partye stem egter nie altyd ooreen nie.

BOER MET DIE OOG OP DIE TOEKOMS

Saai streef na 'n landbouvriendelike toekoms en glo dat ons netwerk hierdie oortuiging in sy wese en in sy struktuur moet weerspieël. Ons wend behoeftegerigte tegnologie aan vir werwing, voorsiening van mandate, en besigheidsgerigte optrede.

Hierdie werkswyse stel Saai in staat om direk met ons lede te kommunikeer. In die lig van risikos waarmee boere daagliks moet rekening hou, is dit 'n prioriteit om hulle van gebeure wat hulle belang raak op hoogte te hou en hulle toe te rus om hulle belang deur kollektiewe optrede te bevorder.

STRUKTUUR

Saai is 'n oopekonomienetwerk wat 'n plat struktuur nastreef, met die kortste moontlike kommunikasielyn tussen die beleidmakende en besluitnemende funksies, die uitvoerende funksie, en die lede en netwerkvennote. Lede is familieboere en vriende van familieboere wat 'n maandelikse finansiële bydrae maak om Saai se doelwitte te bereik. Netwerkvennote is liggeme, organisasies en individue wat in die belang van familieboere gespesialiseerde dienste lewer en met wie ooreenkomste op grond van gedeelde waardes gesluit is.

Saai word deur 'n raad bestuur wat te alle tye uit meer boere as spesialiste moet bestaan. Lede in leiersposisies sal jaarliks versoek word om Saai se standpunte en optrede met die heersende beleidsomgewing te belyn en te verseker dat Saai voortgaan om familieboere se belang te bevorder.



VERENIGDE NASIES SE DEKADE VIR FAMILIEBOERDERY EN VOLHOUBARE ONTWIKKELINGSDOELWITTE

Saai het binne die etos en raamwerk van die Verenigde Nasies (VN) se Dekade vir Familieboerdery 2019–2029 ontstaan en beskou die Suider-Afrikaanse landbousektor as een met 'n gedeelde toekoms en as geïntegreerd met landbou ontwikkelinge en voedselsisteme op die Afrika kontinent en in die wêreld. In hierdie verband onderskryf Saai die VN se Volhoubare Ontwikkelingsdoelwitte (VODe) en interpreteer hierdie doelwitte as gunstig en voordeelig vir boere en landbou, met die gevolg dat Saai aksieplanne ter bereiking van hierdie doelwitte in werking stel met die fokus op landbouvriendelike optrede.

Hoewel beïnvloeding van beleidsvorming Saai se mees prominente funksie is, is dit nie die enigste funksie nie. Saai strek hulle net wyer as beïnvloeding van beleid, na konkrete optrede soos projekte, veldtogte en aktiewe optrede. Hierdie sake word egter gerig deur 'n beleid in ooreenstemming met die VN se VODe en die tersaaklike tyd en omstandighede (konteks).

Saai het 17 areas vir die toepassing van die VODe tot voordeel van familieboerderye in Suid- en Suider Afrika geïdentifiseer. Hierdie sake word nou verder bespreek.

Armoede

Saai beveg armoede op 'n wyse wat histories beskou as effektief en volhoubaar aangetoon is, naamlik welvaartskepping. Geen ekonomiese sektor in Suider Afrika kan bogenoemde vinniger, goedkoper en op 'n breër basis bereik as landbou nie, gegewe dat die onderskeie regerings beleid sal implementeer wat volhoubare en winsgewende landbou bevorder. Om hierdie rede fokus Saai op markgedrewe en winsgewende landbou in areas waar die grootste grootste armoede voorkom.

Onteiining van grond sonder vergoeding en onvoldoende waarborg van eienaarskap is van die hoofredes vir ekonomiese agteruitgang, verhongering en werkloosheid en is derhalwe 'n belangrike prioriteit vir Saai.

Saai beskou die volgende sake as fundamenteel vir landelike ontwikkeling en om armoede teë te werk: basiese dienste soos onderwys, opleiding, infrastruktuur, gesondheid, die skep van werkgeleenthede en die voorsiening van elektrisiteit en water. Derhalwe poog Saai om gebiede waar hierdie dienste ontbreek of ineengestort het, by te staan met die herstel of oprigting daarvan. Oneffektiewe ekonomiese beleid het in verskeie lande in Suider Afrika daartoe gelei dat landboufinansiering misluk het. Hierdie ineenstorting maak dit vir boere moeilik om kompeterend te bly, hulle besighede uit te brei, toegang tot tegnologie te bekom, te meganiseer en insetkostes te bekostig. Saai beywer homself daarvoor om alternatiewe te ontwikkel om hierdie belangrike sake binne familieboere se bereik te plaas. Saai is daarom ook aktief betrokke by privaat inisiatiewe om rampverligting en tegniese bystand aan boere te verskaf, vry van politieke, rasgebaseerde en ander diskriminerende statutêre maatreëls.

Honger:

Saai se visie is om 'n wêreld te help ontwikkel wat vry is van hongersnood, waar almal toegang tot kos het, veral in Afrika. Wanneer mense honger ly, het dit 'n negatiewe effek op die vrede en veiligheid van familieboere. Saai is oortuig dat die ernstige probleem van ondervoeding in Afrika slegs met goeie toegang tot die verkryging van proteïne teégewerk kan word. Derhalwe beywer Saai homself vir verhoging in produksie van lewendehawe, verbetering van

genetika en groter effektiwiteit met betrekking tot suiwel-, vark-, pluimvee- en rooivleisboerderye. Die rede hiervoor is dat groot getalle mense in Afrika nie oor maklike toegang tot plantgebaseerde alternatiewe besik nie. Omdat effektiwiteit 'n belangrike invloed op markte het, is SAAI oortuig daarvan dat produktiwiteit, tegnologie, kommersialisering, modernisering en meganisering van landbou hongersnood kan teëwerk. Die feit dat digitale tegnologie en biotegnologie kompetisie grondig beïnvloed, lei daar toe dat Saai familieboere aan die nuutste tegnologie blootstel. SAAI is van mening dat tegnologiese gevorderdheid slegs moontlik is op grond van navorsing en ontwikkeling, innoverende en hoe kwaliteit opleiding en investering. Dit is ook belangrik om in gedagte te hou dat investering berus op veiligheid, stabilitet en 'n markvriendelike beleidsomgewing.

Saai is daarom daarop gerig om gesonde besigheidsbeginsels in nasionale en streeksbeleid te promoveer. Laasgenoemde sluit versekering van eienaarskap en 'n gelyke en regverdige speelveld betreffende internasjonale handel in.

Gesondheid:

Groot afstande vanaf openbare dienste en infrastruktuur lei daar toe dat familieboere ver van gesondheidsfasiliteite verwijder is en daarom kwesbaar is. Die bevordering van fisiese en geestesgesondheid in landelike gebiede neem Suid-Afrika se unieke omstandighede, asook persoonlike, gesins- en plaasveiligheid in ag. Die agteruitgang van gesondheidsfasiliteite en mediese kundigheid in Suid-Afrika dwing boere sowel as Saai om privaat inisiatiewe wat vry van staatsinmenging is te ondersteun. Saai is oortuig dat mense se dieet en die standaard en kwaliteit van landbouprodukte fundamenteel is met betrekking tot globale gesondheidstoestande en gesondheidsorg.

Gevolglik bevorder Saai die naspoorbaarheid van landbouprodukte, veldtogte om antimikroiale weerstandigheid teë te werk, die inkorting van waardekettings in die produksie van vars produkte en die minimalisering van geprosesseerde kos.

Onderwys:

Onderwys is die sleutel tot welvaartskepping en pogings om armoede en hongersnood te bekamp. Saai is van mening dat daar geen toekoms vir familieboere sonder 'n radikale verbetering van onderwys en opleiding in Suid-Afrika moontlik is nie. Op grond van sy strewe nae 'n verbintenis tot 'n beter onderwyssisteem, beywer Saai hom vir moedertaalonderrig in die klaskamer, spesifiek in wiskunde en wetenskap, asook vir die werwing van bekwame, gekwalifiseerde en toegewyde onderwysers. Saai ondersteun gratis primêre en sekondêre onderrig, handhawing van standaarde en gelyke geleenthede sonder diskriminasie op grond van ras, geslag, taal, kultuur, godsdiens, of politieke affiliasie. Indien onderwys, veral lanbouopleiding, gebuk gaan onder ideologiese, politieke en onwettige optrede en indien teen leerders en studente gediskrimineer word, ondersteun Saai die ontwikkeling van privaat, selfonderhoudende instellings, vry van staatsinmenging en met uitmuntendheid as die enigste doelwit. Op hierdie wyse dra Saai by tot die verbreding van vaardighede en kundigheid van die bevolking en help dit om werkloosheid in toom te hou. Saai is positief oor algemeen-geldende standaarde en beginsels in die wetenskap en werk daar toe mee om dit binne die hele onderwyssisteem te bevorder.





Geslagsgelykheid:

Saai ondersteun geslagsgelykheid en diskrimineer daarom nie teen lede, leierskap, werknemers, dienste en aktiwiteite rakende geslag nie. Geen persoon word bevoordeel of afgewys op grond van daardie persoon se geslag nie. Saai beywer homself vir 'n landbou-omgewing waar geslag geen rol speel met betrekking tot eienaarskap, bestuur, geleenthede en finansiering nie. Binne die raamwerk van Saai se fundamentele verbintenis tot familieboere is die voortbestaan van gesonde gesinne 'n prioriteit asook 'n kriterium waarvolgens uitgangspunte en handelinge beoordeel word.

Water:

Die grondslag van Saai se beskouing oor water is dat voldoende skoon water vir primêre gebruik beskikbaar sal wees, en die volhoubare gebruik en bestuur van waterbronne vir lewende hawe en plantproduksie. Omdat geen produksie sonder water kan plaasvind nie, beywer Saai hom vir regverdige en billike bestuur van waterbronne vir alle mense. Alle vorme van waterbesoedeling moet bestry word en Saai sal, waar nodig, toegang tot en gelyke toedeling van water aan familieboere bevorder. Herwinning, en beide die skep en instandhouding van infrastruktuur, word as prioriteite vir die funksionering en voortbestaan van familieboere beskou. Verteenwoordiging van familieboere se belang rakende beleidmaking en waterbestuurstrukture op alle vlakke is belangrik. Saai beywer homself vir 'n regulatoriese bedeling wat vry is van politieke, ideologiese en korrupte inmenging.

Energie:

Vrye toegang tot elektrisiteit, brandstof en ander vorme van energie is 'n voorvereiste om die beleidsdoelwitte wat hierbo bespreek is en ook verder bespreek sal word te bereik en om hongersnood en armoede in Afrika suksesvol te bekamp. Dit is egter waar dat veral landelike gebiede in Suider Afrika nog baie moet doen om hierdie punt te bereik. Selfs in areas waar energie wel beskikbaar en toeganklik is, word dit hoofsaaklik uit fossielbrandstowwe soos olie en steenkool gegenereer. Saai beywer homself vir betroubare toegang tot bekostigbare elektrisiteit en brandstof vir landelike families, vir hernubare bronse in hierdie verband en vir geleenthede aan familieboere om hulle grond te bewerk met energie wat uit hernubare bronse op hulle eie plase gegenereer word.

Werksgeleenthede en ekonomiese groei:

Die landbousektor beskik oor meer potensiaal as ander industrieë om volhoubare werksgeleenthede in verafgeleë landelike gebiede waar sodanige geleenthede werklik nodig is te skep. Om hierdie doel te bereik is dit egter noodsaaklik dat 'n beleidsomgewing geskep word waardeur werkskepping gestimuleer word. Verder is dit belangrik dat die ekonomiese bydrae, produktiwiteit en waarde van elke werker groter is as die risiko wat hy/sy binne die





regulatoriese raamwerk verteenwoordig. Familieboere behoort as werkgewers die vryheid te hê om werknemers wat nie aan die behoeftes van die familie-onderneming voldoen nie, af te dank. Die voorwaardes vir 'n werkskeppingsvriendelike beleidsomgewing is soortgelyk aan dié vir investering en ekonomiese groei wat binne die Suider Afrika konteks op vryemark beginsels en eiendomsreg gebaseer is. Saai ondersteun gelyke besoldiging vir gelyke werk, produksiegebaseerde vergoeding en vryheid van keuse, assosiasie en geleenthede. Saai verwerp enige vorm van diskriminasie op grond van ras, geslag en ouderdom, enige vorm van gedwonge arbeid en slawerny, kinderarbeid, mensehandel en -uitbuiting. Werksgeleenthede en indiensneming is direk eweredig aan vaardighede, opleiding en ekonomiese groei. Hierdie belangrike aspekte word deur Saai aan die aantreklikheid van beleggersinvestering in die lanbou-industrie gekoppel.

Industrialisering, innovasie en infrastruktuur:

Volgens Saai kan landbou in Afrika slegs 'n volwaardige rol as welvaartskepper en voertuig vir landelike ontwikkeling inneem indien dit moderniseer, meganiseer en kommersialiseer. Om hierdie doel te bereik moet landbou deur goeie landelike infrastruktuur soos paaie, treinspoorlyne, konnektiwiteit, openbare dienste, water en so meer gerugsteun word. Hoewel die staat vir hierdie dienste verantwoordelikheid moet neem, noodsaak die afwesigheid daarvan in Suid-Afrika dat, terwyl druk op die staat geplaas word om hierdie dienste te lewer, privaat inisiatiewe hierdie dienste sover as moontlik sal oorneem. Landboufinansiering is 'n prominente hindernis ten opsigte van landbou ontwikkeling. Gevolglik is gesikte toegang tot finansiering vir familieboerderye 'n prioriteit met die oog op beide die industrialisering van waardekettings en infrastruktuurontwikkeling. Saai beywer homself nie slegs vir die belang van familieboerderye nie, maar fokus ook op digitalisering van boerderypraktyke en die bekendstelling van nuwe tegnologie om sodoende mededinging te verhoog.

Groter gelykheid in en tussen lande:

Saai beskou gelykheid as 'n inset eerder as 'n uitkoms en gegewe die uitkomste van kommunistiese en sosialistiese eksperimente van die afgelope eeu, vermy Saai herverdeling, onteiening, of gedwonge transaksies ten einde gelykheid te bewerkstellig. Saai is daarvan oortuig dat gelykheid bereik kan word deur gelyke geleenthede te skep, veral betreffende onderwys, opleiding en beleid wat werkskepping op grond van prestasie en produksie aanmoedig. Saai is daarteen gekant dat onproduktiewe persone, groepe en liggeme dieselfde vergoeding en groter erkenning as hulle produktiewe eweknieë sal ontvang. In gevalle waar lande se beleidsraamwerke onvriendelik teenoor werkskepping, beleggings, of besigheid staan, is ongelyke uitkomste in vergelyking met lande wat produktiwiteit, beleggings en prestasie aanmoedig,

regverdigbaar. Arm lande met korrupte regerings kan nie aanspraak maak op dieselfde uitkomste as lande waar verantwoordelikheid, verantwoordbaarheid en eerlikheid as waardes gerespekteer word nie.

Volhoubare stede en gemeenskappe:

Verstedeliking word gesien as een van die kragte wat die wêreld grondig verander. Saai is van oortuiging dat die beskerming en bevordering van familieboerderye in landelike gebiede die verskynsel van verstedeliking kan stuit en omkeer deur sodanige gebiede as alternatief teenoor die stadslewe aan jong gesinne te bied. Hierdie doel kan bereik word deur die skep van lewensvatbare dorpe waar skole, kerke en besighede floreer en waar familieboere kan verenig rakende die eerste treeë na kollektiewe waardetoevoeging. Stede sal voortdurend belangrike markte vir voedsel en vesel bied. Omdat die grootste hoeveelheid verbruikers in stede woon, is positiewe interaksie en kommunikasie met stede baie belangrik.

Droogtes, brande en onrus wat gereeld in Suid-Afrika voorkom, is van die grootste bedreigings vir die lewensvatbaarheid van dorpe en familieboerderye. Die staat behoort omvattende rampverligtingsprogramme in hierdie verband te inisieer. In gevalle waar sodanige programme afwesig is, sal Saai betrokke raak by onafhanklike, nie-diskriminerende verligtingsprogramme wat vry van die staat opereer. Binne die Suid-Afrikaanse konteks geld dieselfde beginsel ten opsigte van landelike veiligheid as een van die grootste bedreigings vir plaaslike gemeenskappe en familieboere. Saai sluit daarom vennootskappe ter ondersteuning van plaas- en buurtwagte, asook ander sekuriteitstrukture.

Verantwoordelike verbruik en produksie:

Verbruikers vorm die belangrikste teikengroep vir familieboere: hulle bepaal wat, hoe en hoeveel geproduseer moet word. Verbruikers se voor- en afkeure lei produksieprosesse en verbruikers self raak toenemend meer ingelig en veeleisend. Saai

ondersteun die voortdurende verhoging van standaarde, naspeurbaarheid en deursigtigheid en bly op die voorpunt van digitale tegnologie ten einde familieboere in staat te stel om hieraan te voldoen. Beide produsente en verbruikers behoort verantwoordelik op te tree sodat die voedselsisteem gesond kan bly. Saai beklemtoon die bekamping van vermosing en verliese in die voedselsisteem en glo dat dit deur meetbaarheid bestuur kan word. Saai beskou ook die hantering van chemiese sputten bemestingstowwe as deel van verantwoordelike produksieprosesse.

Klimaat:

Klimaatverandering affekteer min beroepsgroepe so intens soos wat dit boere tref, en klein- en mediumskaal familieboerderye beskik nie oor doeltreffende buffers om hulle hierteen te beskerm nie. Die vermindering van kweekhuisgasse, veral CO₂, word deur Saai as prioriteit beskou, spesifiek dié van energie- en vervoersektore wat van fossielbrandstof gebruik maak. Die negatiewe invloed hiervan is onvergelykbaar met dié van metaangas wat deur die lewendehawe industrie vrygestel word. Saai promoveer en beskerm volhoubare lewendehawe produksie op nasionale en internasionale forums as 'n oplossing vir klimaatsverandering en nie as 'n probleem nie. Wetenskaplike insigte in plaas van emosionele aanvalle rakende die klimaatvoetspoor van die landbou-industrie behoort voorkeur te geniet. Boere behoort die geleentheid gegun te word om winsgewend met behulp van alternatiewe energiebronne te boer en dit aan die nasionale netwerk te verkoop. Klimaatsoplossings verskil van streek tot streek. Terwyl alle ekonomiese sektore daarop fokus om hul koolstofvoetspoor te verminder, is die landbousektor die beste daartoe in staat om koolstofvrystelling betekenisvol te reduseer. Gevolglik steun Saai alle inisiatiewe tot wetenskaplike en meetbare vermindering van koolstofvrystellings.

Oseane:

Saai is daartoe verbind om seebesoedeling te bestry, veral die afloop van chemikalië in waterbronne as gevolg van landbouaktiwiteite. Familievissermanne is soos familieboere primêre produsente, met gedeelde belang, uitdagings en bedreigings. Daarom sal Saai netwerkverhoudings

netwerkverhoudings met die georganiseerde familie vissery-industrie nastreef en opbou. Saai sal saamwerk met die oog op volhoubare, wetenskaplik-gebaseerde gebruik van die blou ekonomie.

Lewe op land:

Saai beskou die volgende sake as prioriteite weens die feit dat dit beslissend is vir die langtermyn voortbestaan van familieboere: die beskerming, bewaring en bevordering van die volhoubare gebruik van ekosisteme op land, insluitend die stryd teen woestynvorming, ontbossing van natuurlike woude, gronderosie en gronduitputting. Hierby ingesluit is die beskerming en bevordering van biodiversiteit en ekosisteme wat op beide grond- en vars water gebaseer is.

Dit lei daartoe dat Saai ook betrokke is in die beskerming van berggebiede, ander filtreergebiede en alle lewende spesies. Saai is daarom fundamenteel gekant teen onwettige jag, indringing van eksotiese spesies en die vernietiging van ekosisteme. Saai aanvaar dat landbou nie in harmonie met die natuur kan geskied nie omdat die natuur nie die surpluses bied wat benodig word om 'n vinniggroeende globale populasie te voed nie.

Om surpluses te produseer word boere verplig om die balanserende funksies van die natuur te werk, soos byvoorbeeld deur predasie en insek- en onkruidbeheer.

Elke boer is egter bewus op watter wyse hy/sy as bewaarder van 'n stuk grond die natuur sy gang kan laat gaan en dit in 'n beter toestand vir volgende geslagte agterlaat as wat hy/sy dit ontvang het.

Vrede, geregtigheid en sterk instellings:

Die omgewing waarin Saai in Suider Afrika gefunksioneer het is getuenis daarvan dat state en gemeenskappe floreer te midde van nie-diskriminerende omstandighede, naamlik vrede, nie-rassigheid, selfregering en desentralisering van mag.

Die ander kant van die munt is egter ook waar. In die afwesigheid van demokrasie, wet en orde, oppergesag van die reg, verdeling van magte en respek vir die grondwet, het verskeie lande die ineenstorting van landbou, ekonomie en stabiliteit beleef.

Saai beywer himself vir vryheid van keuse, vryheid van spraak, vryheid van assosiasie, vryheid van diskriminasie en armoede. Saai het tot stand gekom tydens 'n era toe basiese vryhede en staatsfunksies deur staatskaping, korruksie, diefstal en onbekwaamheid tot so 'n mate ondermyng is dat die voortbestaan van familieboerderye gekompromiteer was.

Die organisasie vorm deel van 'n omvattende poging om alternatiewe, staatsbestande strukture deur middel van kollektiewe burgerlike organisering, mobilisering en aksies te ontwikkel ter wille van 'n vooruitstrewende gemeenskap.

Die ineenstorting van wet en orde, plaasaanvalle en -moorde, onteiening sonder vergoeding en staatsinmenging in markte en geleenthede het elders in die wêreld se geskiedenis vernietigende gevolge gehad.

Derhalwe beskou Saai dit as deel van sy missie om sodanige verskynsels te beveg.



Nasionale beleid moet ter wille van die vryheid, veiligheid en voorspoed van familieboere op so 'n wyse deur oorreding, regsoptrede, internasionale druk en protesaksies beïnvloed word dat 'n omgewing geskep word waarin die grondgebaseerde besighede op plase winsgewend en volhoubaar kan bly voortbestaan.

Korrupsie, wanadministrasie, nepotisme en kaderontplooiing moet uitgeroei word deur besluitnemers en politieke leiers sowel as hulle begunstigdes verantwoordelik en verantwoordbaar te hou.

Ontwikkeling van vennootskappe ter wille van implementering:

Teen die agtergrond van Saai se netwerkgebaseerde karakter as 'n oopekonomie landboustruktuur, is die sluit van sterk vennootskappe om globale en streeksdoelwitte te bereik nie ongewoon nie.

Saai aanvaar dat die hoofbedreigings teen familieplase universeel van aard is en dat hierdie bedreigings slegs deur kollektiewe optrede oor nasionale en kontinentale grense heen voldoende aangespreek kan word.

Gevollik is aktiewe lidmaatskap en betrokkenheid by multinasionale organisasies wat ook die belang van familieboere dien 'n prioriteit vir Saai.